

Tulaga o fanau i le va o kenera

OLA 07 ~ 2016



Afai o le a sau faitau i le faasoa o lenei vaiaso, e faamalulu atu, e le o ia i matou le poto faapitoa i lea foi vaega. Ae e le ‘alofia ai lona taua o se mataupu e ao ona talatalanoa i ai, talu ai lona sootaga tonu ma se vaega o fanau a’oga i nei aso.

E lua kenera— tane, fafine. E lua fausaga na fai ai le tagata e le Atua e pei o le taofi masani. O nisi ataata i le vanu lena e le faigofie ona faamatala. I nisi aganuu i Initia e faailoa le maofa i se fausaga e ese mai, ma faaigoa i latou o le kenera lona tolu o le foafoaga. E tapuai’a pei ni atua ma amana’ia. Peita’i i sosaiete i le itu lalolagi i sisifo, e faaese i latou mai le ata talia masani. Ua mafua ai ona iēina le faafafine, le faafatama, ma ta’utemoniina i latou.

E iai le moni i le le faigofie ona faamatala le tiga i se tama talavou e ola a'e i lagona ma uiga o le isi kenera, i se tino e ese mai. Faapena foi i le teine e amio pei se tama. E mafua ai le vao taofi soona fai (stereotypes) ma afaina ai lagona o i latou.

To'atele ua pule i ola ona o lea omiga i le va o lagona fetineia'i ma talitonuga faanuupo, ua mafua ai lea faaesega o i latou e ese mai.

Lenei ua telē se suiga, o loo gaoioi pea le malamalama o le Alii e ala i le Saienisi. I nei aso ua iai le upu i le gagana Peretania 'transgender' e faamatala ai le va lea. Ua iai le 'intersex' e faamatala ai se tagata e ese lona fausaga ona e maua ai kolomosome o kenera e lua. E tasi mai le 2000 pepe e fananau i Peretania i tausaga ta'itasi e faapea.

Ae e iai nisi fanau e lei tutupu a'e ma ni lagona fetotoa'i, ae na mafua le amio faatama pe aga faateine ona o le tausiga a o iti mai. E faaofu i ofu teine ma seevae teine, poo se teine e faaofu i ofu tama ma milo i le mea e tafafao ai tama; pe ola a'e fo'i se tama i se fanau na'o teine, ma faata'ita'i i ai. E le o so latou sese— a o le faafailelega.

Faato'ā aliali le faigata mo nisi ina ua ulufale i le potua'oga, le potu e vaevae ai le vasega i tama ma teine. O nisi e fiafia lava e milo ma teine, e ulufale foi i potu na na'o teine e tatau ona ulufale i ai. O se faafitauli mo a'oga i le saogalemu.

Lea ua fai i ai se fuafuaga a se a'oga mo le taimi muamua, ua latou saunia se potu e faapitoa mo latou na e tua i ai. E matua lagolagoina e le faasoa lea faiga. O se faailoaga taua lea ma le toa o le iai o i latou nei i le lalolagi, le tatau ona amana'ia o latou 'mamalu' o ni foafoaga faapitoa.

E leai se vave na te fai se lafoga pe a talanoa i lenei mataupu. Auā o le tele o mea tau le foafoaga e lei taitai ona oo i ai so tatou malamalama.

Ae tasi le mau e le siligia lona faatupumalosi mo latou, O le tagata na faia e foliga i Le na faia o ia (Kenese 1.27). Tane, fafine, faafafine ma nisi ta'u, o faatusa uma na o le Atua.

E talanoa nisi e faatatau i le tane o se tamatane malosi, e foliga e faapea mai o tamatane uma e tatau ona pei o Inga Tuigamala i le tino lelei ma le aumalosi, ae e le faapena aga o le foafoaga a le Mataisau i le tulaga moni, e iai foi ma peva ma

vasi ma e tinovavale i le vaai faaletagata; o le uiga
le masu'esu'eina lena o le Atua i lana foafoaga e le
matalatalaina i gagana a tagata.

OLA lomiga 7 o Mati 2016